

煙霞萬古樓詩選
仲瞿詩錄



煙霞萬古樓詩選

王 曇 撰

叢書集成初編

(補印本)

煙霞萬古樓詩選及其他一種

一九三九年十二月初版
一九六〇年五月補印

商務印書館出版

上海大東集成聯合印刷廠印刷

煙霞萬古樓詩選序

秀水王君仲瞿。奇才也。奇於文。亦奇於詩。言論風采。出以遊戲。雄辨博奧。所至傾其座人。類談天雕龍所爲。非狂傲也。而世人咸以狂傲目之。夫狂傲。文人之大病也。君未嘗狂傲。人目以狂傲。一倡百和。而狂傲之名。遂不能自解於世。則露才揚己之所致也。又爲座主吳公假其名。形諸奏牘。得以微罪罷官歸里。而君之名。遂爲世人所口實。屢試南宮。擯於有司。卒潦倒不得志以死。則露才揚己。人因目爲狂傲之所致也。則有才而不自晦其才之所致也。君生平著錄甚富。大半零落。駢體文數十篇。錢君梅溪蒐葺付梓。寄余吳門書局。詩稿十餘卷。君病中付余子裴之爲敬禮。定文之託。裴之沒於漢上。稿存余子婦汪端所。端詩學甚深。嘗選定明三十家詩。遠出牧齋。竹垞。歸愚諸選本上。又重刊裴之澄懷堂集詩。於余詩亦多所刪訂。規正其所爲自然好學齋詩十卷。老輩皆推重之。又嘗爲余戚邵夢餘大令刻鏡西閣遺詩。仲瞿與井叔兩集。恆置案頭。呼之曰老王先生。小王先生。以兩人詩集皆裴之生平未竟之志。各爲選定。病中請於余。期他日必付梓。以完裴之。人世文字之債。余諾之。逾數日卒。余爲作傳。所謂孝慧宜人也。端中年以後。奉道誠篤。知前生與裴之同。自玉清來。今仍歸玉清也。井叔名嘉祿。長洲人。詩人鐵夫先生子也。爲吳門七子翹楚。年未三十而卒。詩極明秀。端爲選存四卷。今年余至繁昌。乃先爲刻仲瞿詩。而誌其顛末如此。道光庚子中秋。錢塘陳文述書於春穀官舍。

煙霞萬古樓詩選卷一

秀水 王 曇 仲瞿

題法梧門祭酒詩龕

十笏團蕉面壁存，推敲人影認黃昏。詩家香火然鐙古，名士門堂祭酒尊。廈以千閒爲老社，地方一丈當龍門。就中獅座容多少，瘦島寒郊一屋溫。

詩海詩城不足誇，一茅頂上蓋烏紗。撐牀史料三千卷，滿屋王風四百家。今上命鐵冶亭尚書纂選順康以來八旗詩集，尚書出帥南漕，未遑哀輯，祭酒已收集四百餘家，時奉旨多收宗室。天下山林仰梁棟，細生毛髮待袈裟。披圖不覺逢彌勒，滿紙圓光揖笑花。

移寓發祥坊第，青藤初花，懷袁州叔也。

一樹藤陰漬碧天，七槐風雨尙依然。分鐙憶隔東西屋，宅分兩院，諸叔東西而居。借宅能居三百年。宋明帝以南苑借張永居，日且給三百年。期盡更請，今諸叔發祥坊第，奉旨不繼。中祕芸書官本在，東院賜書，尙存十分之二，西院書已分寄梁文定第三徙所矣。相公蓮府雀羅便，時韓城中堂借寓西宅。天涯諸叔

專城去，獨坐瑤階撥阮絃。

兩袖清風一襲塵，幘揮南阮六朝人。江東花雨臺城路，司馬青衫白下春。手版尙留顛老拜，叔嗜石，攜壁以百數，第中尙有存者。黃金曾鑄莫愁身。莫愁湖之成，曇作文募秦淮絃管青溪筆，程司馬作青溪閒筆。一去袁江莫重論。

奉和舒鐵雲姨丈見贈之作

戎鼓喧天一柱銅。南望之役。同參軍幕。藏事時。制府監司鑄。鐵於貴陽之甲秀樓。仍鄂大將軍故事也。蠻鄉兵幕瘴鄉風。書生汗馬髀留肉。初。巡撫馮公議以軍府

辦事實錄列請議敘。先生辭之。後亦奉部不准。時論高之。妖女囊仙血尙紅。黃囊仙。妖女也。以巫蠱煽聚。擒歸本道營。先生與之秉燭。以美言甘之。故降者不叛。才子文章山鬼

泣。論黃峇文徵。苗人識字。皆哭拜解散。婦人茶火大王雄。初達南望。妖巫黃氏旗鼓最盛。時檄調雲南土練。中有龍土官之妹龍玄

部遂不能軍。囊仙者。變語謂姑娘也。中年空囊從軍筆。不乞平夷一字功。些些招魂不到家。留黔三年。先時傳先生過朱仙鎮。爲

其賊婢。青衫白面又長沙。戊申。歸吳門一月。又應楚藩通方伯樞撫湖南軍營書記之聘。余面謁東坡送爲施州詩。共怪

所害。見李東陽。三閭血祭叢祠宇。故楚三閭大夫祠。土人頗爲屈公祠。別。書額改正焉。并請於本藩司點聖之。太傅承塵破廟花。賀老琵琶怨場

屋。疊時寓吳門。約以是冬同赴已未會試。書額改正焉。并請於本藩司點聖之。巴江烽火瀟江月。愁夢湘娥十二髻。

重過穀城書宋汝和觀察項王碑。

大雞山後小雞前。馬火人燐一塚煙。白帝山阿五十步。羊公碑版二千年。墓自漢迄今。從無碑碣。汝和觀察守汝。始表禁步。霸才

遇主談何易。轅下無牛祭不虔。亦有烏江歸去客。穀城山下再流連。

晉征虜將軍東亭侯廟在虎山之東。俗所稱短簿祠也。薨廡雄暢。登內殿五十三級。爲夫人之宮。余

以雲孫禮。致禱於吾祖之靈。假館內寢。獻詩一首。

老祖烏衣巷。雲孫馬糞寒。青氈佳子弟。團扇晉衣冠。借宅吾宗古。司香內寢安。淮流如不絕。留我一入看。

施府君神絃曲

思賢鄉有施府君廟。最古者建自宋景定中。今稱祖廟是也。府君名伯成。姓施氏。九歲爲神。土人

祀之旱澇輒應。至景定載入祀典。已逾百歲。俚俗神歌。謂府君生長神異。託活外氏。童而好弄。如所稱驅牛入地。放鵝上天。幻迹不可殫述。又謂府君九歲脫化。探鷄巢至殞。遇大蛇。古木尙在。則皆東野傳言。似足徵實者也。壬子二月。乘輿廟下。聞野巫操盃酒而祭者。陋其俚而爲之辭。

東方瞳瞳老鷄死。樹上蛇來食鷄子。蛇鳴一聲破巢去。雷公吹巢墮流水。野田不曉神靈聚。土馬泥神夜言語。七秋八月水花乾。巫來一筭天下雨。神死幾年。驅牛下黃泉。黃牛入地走。野鵝飛上天。鵝天釀酒殺羊爲神壽。三十二都歲大有。魚鴨千頭米千斗。大姑箕。小姑帚。蠶子蛆蛆繭盈缶。一歌施府君。府君爲我聽。螭蝗不教出。囓食田苗青。再歌施府君。府君爲我醉。囑付馬頭娘。湖桑不妨貴。百年三萬六千日。處處笙歌好年歲。迎神曲。送神曲。神去神來受神福。願神化作東方雲。雨我村村粟。不願老天雨我珠。和金鐘山題李玉廟并書夫人寢碑。

安吉爲唐故鄣地。公平輔公。祔於此。故碑有平盜丹陽之語。今名李王山。山中碑版林立。皆唐宋人書。案公爲韓擒虎外甥。初見楊素。卽有拊牀推坐之目。公爲庸人。亦當感恩知己。況英雄乎。是必無私其侍姬爲申公巫臣之爲者。小說欲以英雄推夫人。故重誣衛公矣。詩以辨之。

金天華嶽一書通。首上江陵十策功。青海驕汗巢穴盡。陰山亡主幕庭空。韓擒宅相難爲舅。楊素胡牀推與公。能得青年有知己。良弓高鳥自英雄。

我讀虬髯傳不然。夫人墳冢象郝連。衛公謹畏如平日。越國房幃況晚年。侍史忍辭袁盎去。舍人肯負孟

嘗賢唐書兩種難憑信。況且虞初九百篇。

上巳日蘭亭時歲在癸丑。

抱書看山山欲眠。酌酒勸花花可憐。上巳風光來此地。永和流水到今年。山如好女能濃笑。春不人情做冷天。四十一賢香火地。更無人與塵談元。

登良鄉大防山

冀北山河一雁長。黃花春影見牛羊。軒轅臺冷風煙古。碣石宮墟草樹荒。千里南車迷火帝。百年羸馬哭昭王。幽陵兩道長榆外。濕水無聲下范陽。

瓊花島金鼇玉螭橋所見白堦也

玉女曉披衣。翩翻一塢飛。可憐蕭母后。不見李元妃。金粉三朝在。聰明一月非。水精簾下看。惆悵不能歸。

遊西山壇柘寺

手接太行嶺。平看一地煙。時逢小春月。身到大西天。出郭青牛穩。馱經白馬便。雞山難可見。彈指此壇邊。

清字經館奉呈章嘉佛

時譯藏
既竣

逍遙園裏貝多春。波若臺邊笑語親。校定舊經三百卷。歸依乞士五千人。華言唐古紛紛異。國語房融筆筆真。授我楞嚴總持意。傳鐙畢竟有前因。

平山堂同金棕亭羅兩峯兩先生作

淮南雞犬竹西僧。占盡揚州此一層。百劫山河隋大業。一家文字宋廬陵。匆匆絲竹空哀樂。久久樓臺幾廢興。笑問木蘭今長老。南朝香火有然鐙。

瓊華觀讀明武宗皇帝禡祭記

武宗征宸濠。駐師觀中。記謂其觀兵揚州。一時金鑒介甲之士。市巷坊街。幾無立足。禡祭之日。敕諸生執絲竹。襄祀者二百餘人。軍容之盛。振古無比。蓋武宗處中葉太平全盛之時。揆文奮武。仿漢唐渭橋故事。安不忘危。致有深意。而讀史者。似謂其弄兵好勝。不知有宋九朝。全賴澶淵一出。使天下知有黃龍大纛也。況武宗賢相在朝。名將視師。天下將垂拱無爲。此玉搔頭一部傳奇。雖曰遊戲。亦一朝樂府之不可不傳者。

簪花鼓吹下揚州。

武宗南巡。戎服簪花。鼓吹前導。見陔餘叢考引傳維麟明書。

如虎宸濠一縛休。此日六軍同祭馬。當時一炬笑迷樓。三

千殿腳悲瓊樹。十萬貔貅弔玉鈎。天下安危注將相。大明天子自風流。

莫愁湖落成奉呈李松雲宮允作

香山未到。西子湖枯。醉翁不來。環滁水涸。以故吹安石之竹。則東山不惟一時。讀少陵之詩。則漢陂可以千古。守土者卽不能名山學士。號湖郎官。而古迹之湮埋。亦當事者之責備歟。石城西有莫愁湖者。當甓社珠沈之後。太白樓荒之日。蒲生董澤。草長蘇灣。裙屐去而人影銷。笙歌散而衣香寂。久已哉。金粉百年。雲煙已散者矣。湖在明初爲徐武甯王湯沐之地。當時也阿侯故宅。曾經

光祿池臺少婦青樓。忽作將軍樓閣。二百八十年。是處風多。三萬六千場。此閒人醉。今也大功坊第。門戶猶存。十廟功臣。子孫尙在。豈非良弓高鳥。范蠡先聲。醇酒嬾人。信陵故智乎。松雲中允來守是州。重新黜堊。圖凌煙舊日丹青。再買臙脂。染好婦當時顏色。某青鞵布襪。弔古懷今。慨異姓之眞王。可憐功狗。笑開元之天子。不及盧家。序滕王高閣。落霞與孤鶩齊飛。作王儉短篇。老子與韓非同傳。

天子無愁妾莫愁。此湖傳是古青樓。功臣十廟同時盡。異姓中山與國休。宏光滅而中山國絕甲第華林留舊石。將

軍絃管剩箏篴。高明詞曲琵琶記。

高帝以則誠琵琶傳奇。比之五經者核。

帝亦風流護阿侯。

杯酒兵權到此時。黃袍還恐美人知。六橋湖柳閒蘄國。一部清商老尉遲。佐漢留侯如好女。大明皇帝本能詩。可憐一地胡藍血。不與歌兒舞女期。

景陽宮井爲寺僧失其欄。今新甃也。

美人不照華陰井。叔寶心肝麗華影。失我臙脂婦女愁。六宮淚水如泉冷。陳宮往日八才人。如魚如水一家春。金釵照月年年豔。玉樹從風日日新。麗華十歲兵家女。金屋承恩阿嬌貯。三鳥初來王母家。玉清本在天孫許。梧桐結子早盈囊。豆寇含花乳鳳皇。得寵不緣憐太子。專房只合侍承香。求賢殿裏西來佛。不妒蛾眉愛如月。長樂宮花春自芳。昭陽院草秋來歇。選入東宮初乘鸞。承封冊拜綠霞冠。中宮不數陳皇后。侍女何須賈佩蘭。君王初起齊雲觀。複道擗天鬬霄漢。欲規漢武合歡宮。不仿長楊射熊館。風流直是

住臨春。三閣連連兩貴嬪。宮中妃子三千歲。天上張星十二辰。洞房左右離離曲。翡翠沈檀間珠玉。寶帳宵眠兜沫香。金牀畫爨仙香燭。官家歌舞愛山池。虹草恆春好四時。樂景不緣天上有。賞心那有外人知。復有深宮往來道。淑媛亦在蓬萊島。美人爭說健仔賢。昭儀誇道修容好。黃門給事肯教遲。牋奏封章事。事知中使只稱李善度。內官兼愛蔡臨兒。臨兒解識風流狎。鬢黑如雲貴妃髮。七人喚取侍神仙。十客呼來伴明月。江總文章足大觀。客卿詞賦是豪翰。宮裏佳人袁學士。殿中才子孔都官。雲光牋采桃花色。哦詩寫近君王側。不須安世譜房中。何必周南勝諸國。麗留樂奏罷琵琶。挾彈吹笙盡內家。那曉春江花月夜。祇知玉樹後庭花。結綺宮中人婉孌。望仙樓下呼兄弟。天子宮中且莫愁。尙書不討君王計。班姬文學左姬賢。飛燕如花事事專。左右貂璫纔五十。後宮巫蠱僅三千。三宮昨夜傳妖厲。一足山禽字成謎。閣中天子夢黃衣。山鳥來歌奈何帝。君王身是佛家奴。黃塵皂莢不須呼。人間萬歲爲天子。不若長星醉一壺。蜀江流梯中江隘。烽火南來一衣帶。璽書十萬下江陵。飛來忽到南天外。春官絃管正登臺。京口城門昨夜開。貴妃尙在君王膝。天子焉知有禍來。鍾山鐵馬蓋山谷。擒虎南軍勢如竹。江龍已扼上流軍。白土岡南鬼神哭。孔郎俠少不知兵。游戲承當大將營。蠻奴只作迎降計。司馬焉能一背城。摩訶少小蘭陵族。急作皇畿大都督。平生名勇冠三軍。今日爲俘陣前辱。此時天子昵宮娃。牀下軍書事事乖。僕射不堪還獻納。舍人那敢更談諧。官家最是風流子。不作降王未能死。金井無波好誓心。河魚已著春秋史。流傳此井已千年。欄口丹書字字鐫。愚公擔石焉能塞。精衛銜砂不教填。轆轤索斷銀瓶冷。古甕相傳照形影。香徑

宮花百草荒。君王鼓吹千年靜。景陽宮瓦已成灰。狐鼠空山雉鳥媒。山僧不忍前皇辱。重與官家釐一坏。從古繁華若轉燭。琵琶浪寫開元曲。京洛門前舊日駝。闔閭臺下當時鹿。銅雀西陵事可哀。行人誰識故宮槐。六朝脂粉成塵土。八代風雲變草萊。寒食飛花莫相送。長城公老臙脂痛。天子風流自古然。往來多少難臺夢。

石颿樓

弔琴娘也。琴娘。天台魏氏女。以國朝順治三年死潤州之甘露寺。按魏自序。琴娘歸三月。鞞鼓南來。擁之北去。歷河渡淮。欲死無地。既而琵琶擊碎。幸脫餘生。破面毀形。蒙垢廢迹。晝乞道途。夜竄青草。託流水之飄花。言來京口。遂登北固。涕淚如狂。憶昔爹娘。空傷魂魄。良人天遠。存沒何知。惟幸遊魂帶血。夜化啼鵲。猶恐不解南歸。雁峯路絕。因題短什。望達孤親。遠事流傳。附諸誌末。亦足偉矣。嘗覽潤州故實。如華山畿。杜秋娘。瑣屑閨情。文人膾炙。琴娘以奇特孤操。委身宿莽。翰墨無聲。訪諸操觚。未能口實。予登石颿之明日。緝綴繁辭。次其梗槩。雖不足振揚藝林。亦未始非宏獎人倫之本意也。

江上晴雲畫如絮。紅梨花底紅禽語。紅禽樓下逐花飛。樓上飛紅墮樓女。金閨自述琴娘嫁。銀鑪爇麝檀郎夜。珊瑚枕絮不成眠。玳瑁妝花未曾卸。鯨鯢唐突月翻營。蜚娥一旅雪登城。當時鳳吹樓頭出。今日鶯啼馬上聲。敲冰斫凍朝漿汲。掩翠低紅夜深泣。上前鸚鵡倩人扶。落後弓鞬亂流立。黃雲墮陣濁河頭。紅

旗扱馱清淮流。駝囊瀉酒駝鞍喫。鬼妾呻吟鬼馬愁。蠻氍帳裏蠻絃語。春燕秋鴻亂無序。崑崙不是姓康人。琵琶忽中秦庭柱。鞍騾抱馬三更櫛。戴月承星伯呼叱。偷壕出塹死誰知。虎口縋生命如虱。野田積水淮南道。日乞窮途夜青草。娉婷秋月缺誰圓。爛漫春雲亂誰掃。雲煙羃歷天如弓。關山不見昔來鴻。猿驚鳥怯傷前侶。鶴寡鳳孀泣故雄。北固山頭半城雪。西陵渡口行人絕。魂禽叫下土山雲。鬼鳥啼紅寺門血。阿爺生我阿娘愁。袖中卻扇妾郎詩。君生妾死君休恨。妾死君生妾不知。風風雨雨山頭壁。字字行行淚泚泚。此時烈骨枕荒涼。此夜遊魂免驚惕。豚魚吹浪江生風。雲霓爲佩月爲容。石驪山下颿來去。且上颿船到雁峯。江南遊子青衫客。捉筆題詩替鳴咽。一弔江樓諡君貞。再弔江樓諡君烈。

焦山夜泊

華嚴靈館壓巉峴。一片風煙接寂寥。大地星河圍永夜。中江鐙火見南朝。魚龍古寺三秋水。神鬼虛堂八月潮。獨上數層捫北極。滿天風露下銀霄。

漂母祠懷韓齊王作

王孫如此不忘情。漂母祠邊浪有聲。作帝何妨先楚漢。忌才畢竟是良平。恩從一飯甘刀俎。義不三分合

鼎烹。

三分鼎足之說。始于西漢項王之約。東漢書述之書。

賴有英雄劉季在。肯教傳得蒯通名。

奉酬舒鐵雲姨丈

十載聲名眠裏思。天涯親串見時遲。江湖到處無家住。風雨相逢有贈詩。兩姓中衰諸舅說。一身家難母

姨知故鄉豈少論心處。不忍言情淚要垂。

憫忠寺石壇。唐太宗瘞征遼戰骨處也。

沙蟲猿鶴亦從龍。豈是英雄竟不逢。失地降王生有廟。

唐英雄廟以祀李密建德太宗時建

無功名將死難封。命無麥飯歸

殘骨。福不直茅負戰攻。一樣君臣時際會。昭陵陪葬有青松。

長椿寺展明慈聖太后像

九蓮花下現天神。奈素生香母后身。衣法尙傳童女面。家風原是國夫人。中宮講讀悲冲帝。勝國絲綸慟老臣。再乞田妃遺像看。茂陵金碗一朝春。

落花詩

如此飄零怨也遲。斜陽肯照未殘時。生成一樹桃花命。冷落終年后土祠。隴水人吹三弄月。孤山魂葬半墳詩。寒鴉齒冷秋煙笑。死若能香那得知。殘紅殺盡綠難肥。誰想逢年再夢緋。春了定教分手別。山空只好背人飛。從遭幻女拋來著。敢笑文殊放下非。千里胡沙千里月。琵琶此曲是明妃。

銅雀臺故址

如許疑墳冢冢煙。殘磚猶字建安年。荒臺鼎足三堆在。亂世奸雄一瓦全。七子賓僚名士誤。二喬夫婿婦人憐。曹公石墨香姜閣。焚卻君苗不忍研。

霍太山感李靖騎龍行雨事

畢竟功名不可遲。騎龍須趁少年時。霍山老母今何在。閒煞當年李藥師。

希夷洞

一枕無憂樹。關門作睡王。未登乾慧地。已到黑甜鄉。混沌古無譜。邯鄲夢不長。看來仙佛事。亦是一黃梁。

唐河西節度王忠嗣墓

倘不偏聽林甫讒。以公持重住潼關。喪師未必徵舒翰。反狀真能殺祿山。出處但爲平世將。功名早在古人閒。嫖姚貶死祁連在。血戰荒阡草尚殷。

留侯祠

子胥鞭楚楚不絕。留侯入秦秦卽滅。英雄爲報一家仇。何苦漂流萬人血。胥不得佐太子建。良不得佐韓王成。不爲赤松走。幾爲猛犬烹。功人功狗兩無益。徒受亭公謾罵名。張良不食穀。李泌不娶妻。早欲祠黃石。何如老白衣。君不見五湖范蠡載西施。一舸鴟夷去已遲。魯連不忍秦皇帝。密鑄亡秦一柄鎚。倉海君爲仲連士。

驪山烽火樓故址懷華清遺蹟

仰不見斜陽羯鼓吹笛之樓。俯不見望春樓下宏農得寶之舟。何處宜春舊時苑。何處芙蓉勝容院。明珠何處南箏殿。亦不見鬪雞走馬內毬場。桃花何處元都觀。唯見驪山烽火樓。潼關走敗哥舒翰。我復登山

望馬嵬。佛堂紅粉已成灰。當時馬上朝天去。一雨淋鈴再不回。憶昔開元全盛時。華清宮殿此參差。三姨宅裏分脂粉。妃子宮中洗祿兒。三郎羯鼓甯王笛。梨園龜年吹鼗栗。教坊傳喚念奴來。野狐笙篴賀老拍。新豐女伶謝阿蠻。三百萬錢犒樂籍。留得清平調幾章。而今何處按霓裳。自從一曲長生殿。陪下優童淚幾行。踏到驪山最上頭。琵琶西去出延秋。四條絃線今生斷。我亦斜陽無限愁。仰不改韋杜城南尺五天。俯不改鳳棲鴻固樂遊原。皇子陂前月。清明渠水煙。紫峯白閣依然在。香積慈恩不曾改。太乙終南萬古青。天寶繁華十三載。傷心最是美人身。承得君王多少恩。朝廷不辦干戈事。輕把興亡罪婦人。忠言逆耳。蕭妃子。狎客吟詩孔貴嬪。從來夫婦愛。何必盡昏君。叔寶心肝攪一醉。三郎檀板棄三軍。細取唐書讀。何關楊太真。君不見晚唐九廟無皇后。也有朱溫殺滅獍。

漢陂舟泛時也。斜陽既散。新月未來。

高冠潭北漢陂東。紫閣峯陰一抹空。襖靄波聲隨櫓出。夕陽煙影進城紅。沿隄人語當頭月。隔水湖鐙帖岸風。呶啞一聲全不見。小舟搖入亂雲中。

漢武帝茂陵

祖龍而後事驅除。千古雄才斷不如。一統早收南越地。六經始重聖人書。求言帝度容方朔。問道儒官用仲舒。五十四年文治日。天山犁得幕庭墟。

求賢初詔下金門。一榜賢良百十人。容得馬遷留謗史。能成蘇武做忠臣。張湯峻法刑名好。汲黯狂言翫

諫真明說賦才無用處。鄒陽枚馬任沈淪。
西域河沙古未開。鼂牛微埃接輪臺。掃空瀚海長城外。斷得匈奴右臂來。和議終非中國計。窮兵纔是帝王才。守文弱主書生見。難與英雄靖九垓。
壺關一悔奈匆匆。思子歸來僅有宮。命將不曾封李廣。愛才畢竟誤江充。神仙大藥無消息。方士招魂又鑿空。不有茂陵遺恨事。怎教人士哭秋風。

三班曹大家祠

一門文賦有簪纓。傳得家兄父子名。班固史才歸妹氏。馬融經學是門生。馬融從昭受學村留絳帳先生在。東南爲絳村家有楹書子婦成。一疏酒泉生入得。玉門關外不勝情。

絳帳村相傳爲馬季長傳經處

苦無時命趙邠卿。到此猶聞絳帳名。徒有將軍西第頌。並無絲竹後堂聲。殘經易拜班昭讀。胡粉難爲李固情。前列生徒後女樂。不應謀殺鄭康成。

秦穆公墓。史稱秦穆公祈年觀下。今鳳翔城東南隅也。

一夢鈞天霸業長。秦泉口氣定咸陽。尙書作誓經文在。左氏尊秦史筆彰。豈有孟明赦一眚。斷無黃鳥殺三良。小臣或有攀髯意。蕭史飄飄隨鳳凰。

登漢王將壇